

齊東縣志

書

新修齊東縣志卷之七

齊東縣知縣余爲霖纂

藝文編

文非華藻之謂也或以紀事或以志人或以表山川之勝或以彰學問之奇當其觸心應手真不啻風雷之激而雲霞之蒸有煥焉不可掩沒者則見藝卽以見道也前志所載雅俗並收真僞相半非盡文之不可傳也卽字句光華比屬倩麗何關於

齊東縣志

卷之七

藝文

一

事何關於奇勝哉予涖政之暇披新閱舊去穢刪繁凡政教有裨者手著之散軼可錄者收輯之切要者因仍之荒謬者訂証之先以記示不愆也次以傳示可久也繼之以序而本末詳約之以銘而鑒戒悉他如生順歿寧之理類見於志幽人韻士之致備形於詩多不厭詳少不嫌畧俾讀是編者流連百代之盛追維賢哲之林或借以憑吊山川或因以發揚學問則文之裨蓋豈淺鮮哉則此編

謂之載藝可也謂之載道可也

齊東縣志

卷之七

藝文

二

記

始建學碑記

元李謙

夫子之武城聞絃歌之聲笑曰割雞焉用牛刀子
游對曰偃聞諸夫子君子學道則愛人小人學道
則易使也夫子是之至謂前言戲之耳縣無小有
民人社稷均南面子男之君其職以承流宣化爲
務不先之以教化可乎此建學立師所以不可緩
也齊東在前代爲一鉅鎮隸淄州國初鄉豪割據

迭相雄長及天下旣平升鎮爲縣隸河間爲宗室
其民錯居而商稅則本縣實司之土俗以蚕織爲
業通功易事懋遷有無以贏什一之利致貲巨萬
者非可一二數往往狃于素習唯知趨利而已監
縣侯探馬赤者其祖曰不魯不花曾爲本位斷事
官歲奉命撫安居民父不列阿土官敦武校尉充
縣達魯花赤兼管諸軍奧魯勸農事至侯襲其世
爵來蒞是邑溫恭愷悌好賢樂善居任旣久知共

舊染當革不可無教慨然以興學爲已任縣故有
大成殿陜隘卑陋不足以展禮容乃行眎城北隅
得隙地三畝有奇屏菑翳畧基址峙糗糧具財用
陶瓦甃躬率僚吏過巨室之門開諸義理而告之
話言以故人樂輸所有而不之吝經始罔亟必俟
其三農之隙而屬役焉且親操畚插爲之倡以故
衆勇于趨事而忘其勞侯董蒞其事經營締構歷
十寒暑始克迄于有成廟制弘偉節稅輪奐爲旁

郡學宮之冠象設端嚴彰施足徵爲講授之堂于
其後匾之曰資淡旁列四齋曰惜陰曰時習曰切
問曰近思招集子弟秀民以教諭之是役也糜楮
幣無慮二萬緡賢廡神門以次興作主簿周砥教
諭馬克敬實相之前教諭夾谷元素不遠數百里
踵門來謁曰齊東之爲縣自國朝始齊東之有學
自我侯始不可無記敢請予嘗訓庠序名教之地
人材所從出聖天子尊道勸學崇化厲賢詔數及

之所在守土之吏奔走從事惟恐其後今庠序
天下教事粗舉然閱歲滋久未聞有特起之士經
術文雅輔贊治化者何也無乃開導訓飭有所未
至耶抑三物賔興有所未盡耶殆所學非所用所
用非所學學者之心趨所易而舍所難徼近利而
忿遠圖此其所以不能振厲興起者也雖然天理
民彝性所均賦六經載道格言具在矧藏修有所
講求有師誠能朝蓋暮習優柔厭飫安知不有博

學洽聞爲時名卿者出焉十室之邑必有忠信豈
得盡誣一世哉丙午冬十月旣望記

重修學碑記

元邑人李惟彥

我皇自開創已來韜戈戢武以崇儒右文爲治上
而京師下而郡邑皆祇嚴廟貌建學立師廩生徒
俾教養爲興起斯文之所齊東小而富庶隸河間
爲僻遠然土沃民秀風淳俗美甲他邑大德間監
邑探馬赤叶尹簿起大殿皇慶壬子又諧寮樂作

門廡繼而曰堂曰庖亦不乏人歲月久不無廢圯
今邑尹鄭侯以前作者心爲心惻然于中監簿幕
亦贊其成計庸度費捐俸揮金易弊而新是圖乃
理傾葺漏飾垣壁丹楹闡綠其疏而加之槩鳥鼠
去而風雨除旣雄且麗愈嚴奉祀之歸肇役于至
元丁丑秋九月四日就工于是月之旣望邑文學
魏君士文欲刊諸石以開來者請予言而志之余
聞吾道之在天下若水火菽粟布帛不可一日無

無則饑寒立至不能一朝而爲天下主張綱維非
吾道其誰道也若吾夫子不幸生于春秋擾攘之
際心斯道身斯道口斯道而筆斯道以壽于無窮
雖沒千六百餘年之久而其道昭然如一日噫後
之學者果能游息于是而仰夫子之容儀有所感
發而興起焉請自茲而張本邑人李惟彥謹記

聖惠泉記

元中丞張養浩

延安邑有井在宣聖廟旁始邑無學至元壬辰成

君輔之倡邑人經始焉既成遊者寢盛嘗病遠汲相與度地鑿井得泉而甘咸曰茲邑居者多矣其爲井二十所水皆鹵而茲泉獨甘殆地靈耶抑諸君感聖賜耶不然何秘於昔而發於今遂名其泉曰聖惠汲旣便邑中抱甕者駱驛不絕歲久弗治邑人楊均等與成君之子守智滌焉而井復舊儒生傅澄以名泉之意與其事顛末走書京師以記爲請嘗試爲之語曰子亦觀夫水平一勺之多不

息其逝放乎四海學者之志於道也苟不息漸進之功有不亶亶成章而達者乎嘗讀易而得其義矣易井之象曰木上有水井井泥不食以至井冽寒泉食向非有六四甃脩之德則終亦無禽而已矣蒙之象曰山下出泉蒙君子以果行育德夫旣言德行矣果育誠何事哉聖人遠矣二三子誦其書繹其意以求其所以學學以致道聖人之嘉惠者不亦津津而不窮也耶至元五年中丞張養浩

記

德異泉記

明林瀚

齊東學宮之南舊有一井堙塞不食爲歲且久成化已亥江都趙君廷光宰是邑循良之治蔚爲山東首稱民咸歌之間詣明倫堂程試諸生爰矚斯井之塞而詢其由衆曰鹵故也趙曰噫盧城之井苦而復甘在昔可考試一浚以驗何如遂命役人出其泥濊至五六仞方始及泉泉冽而寒飲者甘

之汲者良以爲便凡邑父老皆扶攜聚觀且歎曰此吾侯德政所感也不然何斯異泉特爲吾民出耶請名之曰德異夫井德有常初無甚異惟茲變苦爲甘則山川靈秘轉移之機不有所感召未必然爾是知非井之異乃政之異非政之異乃德之異也嗟夫合浦玄珠以孟常復還中牟飛蝗以魯恭不入感化之妙一而已成化十八年尚書林瀚

記

邑簿侯岳先生去思記 明邑人王淵記

余邑簿侯岳先生以嘉靖己丑冬謫官來茲逮辛卯秋卽擢山西曲沃令及行闔邑士夫及父老擁留先生泫然流涕而去去後諸生不能忘爲立碑乞余爲記以永其思余惟先生之初謫也聞者咸謂先生性剛勁必不安此官及至無異他簿人皆樂與之接先生嘗示諸生以性命之奧其學一尊陽明先生諸生始駭而卒信之齊士由茲乃知有

聖賢之學邑久乏科今一舉三人喬子文岱潘子應科及余豚子一鳴則先生樂育之功於是乎彰矣初先生攝縣事見大清水漲田禾盡没先生曰大清河勢下水可導也乃濬蔣家溝俾橫流就渠達河以至於海田不爲殃者數百餘頃庚寅夏初蝗蝻大發先生曰蝗之捕也小則易乃率民捕之忽有群鴉四飛來食蝗食足就水吐而復食又有蛛網結罩蝗不能飛蝗乃殪時且大旱民心皇皇

先生乃詣壇跪禱烈日中地不張席及雨大注衣
盡沾乃起是歲乃登民乃蘓先生嘗觀風郊野見
荒田頗多曰此可坐視耶卽請於上司以羨銀買
牛四十五具用補不足逃者聞風日漸歸復邑有
李氏者上母下婦三人皆少孀不他適且貧甚內
外無尺童前侯嘗置之養濟院中先生曰此不冠
男子也爲子不死孝爲臣不死忠媿茲婦多矣可
以衆人畜耶乃買地一區爲屋三楹以居之復請

於上司月優米二石歲給花絨五十斤邑士女相
傳知節義爲美事茲皆先生德澤感人之深者則
我齊人之思先生於不忘也宜哉先生名倫字厚
夫別號雲石萬全都司人順天壬午鄉試丙戌第
進士授行人司行人陞本司右司副以諫言拂上
意而有此謫嘉靖歲次癸巳孟夏邑人王淵記

黃侯去思碑記

黃公河南內鄉人嘉靖一十

釐我東人凡五易歲壬子夏擢濟寧州刺史去之
日民環泣遮留購履存愛遠近歎息若有所失癸
丑夏傅黨等謀勒碑記惟侯實心愛民幾致刑措
革弊除奸專行化感如倡會聯儒視學講論輔翼
振德群業能成如扣成人站畝減三文酌處鈔鹽
人減半分巡攔財物令戶自納免其陪徵畝省民
財不下萬兩如捧檄放關惟錄私載斥却千金群
弊肅然如招撫逃亡聞風復業八百餘丁戚屬免

累彼此安堵如勸處牛糧開耕荒田三千餘畝及
夫帶徵貯藏截補貧糶免致逃移動以千數至於
每歲更里長每季馬騎驛夫收戶常例嚴禁痛除
畝省民財千八百兩他如懲刁鋤暴治橫除殘風
俗以美善良以寧規定一時惠行無盡宜勒貞珉
以表公之大得民也公諱堂宇允升河南甲午科
舉人學業爲世所推號方泉先生卽齊民呼之爲
黃青天 商謂之爲黃澄清藩臬目之爲黃一時

者邑人成堯卿撰

修儒學碑記

明元城董復亨

去濟南東北百五十里而遙有邑曰齊東本古鄒
平地其地西接長樂東隣青平北迫無棣南望陽
戶口地賦風習俗化較諸邑可伯仲獨人才寂
寥無聞焉癸巳冬絳州陶侯登來爲令侯故恭分
公當戶孫家學淵源能用文章緣飾吏治慨然謂
文翁守蜀得長卿昌黎令潮得趙德此邑也誠椎

故齊魯文學之鄉何至不得比蜀與潮哉乃時時
進諸生問狀諸生曰人文鬱也莫之暢也已問諸
生學宮狀諸生曰地氣屯也莫之振也侯曰是而
諸生本業諸生爲政非而諸生本業余代諸生爲
政諸生各前嘖嘖頌明府愛我因擇高等弟子聚
之學宮日課月試稍稍弘獎其警策而彈射其紕
謬者諸生業業以精進侯曰可矣捐俸鳩工爲一
新之殿四楹廡二十楹祠十二楹堂四楹齋舍周

垣稱是纔三浹月告成事諸生復前嘖嘖誦明府
愛我而學博先生焦相遣于生等走陽邱謁余碑
記侯余同年友又同官此一役也暢人文振地氣
功德誠遠顧侯恬淡落穆不自見德諸生柰何而
以此一卷石報侯于生等又前謁曰諸生柰何而
不以此一卷石報侯余無以難諸生乃爲之記元
城董復亨撰

雙貞碑記

明邑令白 鯤

齊東縣志

卷之七 記

十三

齊東縣東十里許縣氓李良代者二女天性幽貞
時年在二旬前俱未許聘別姓父歿二女號泣恨
不能殉未幾母王氏亦歿二女慟復如是且謂家
貧弟幼考妣禋祀乏人矢志靡適紡織爲生計承
祀事心堅金石清於止水幹技凡五六週歷數十
年愈久愈不移其心真可以昭天地格奸頑也往
歲齊饑盜竊里閭家有擔石者殊不免二女獨不
罹此變非貞心動物曷能感格穿窬若是歲戊子

守土呂公巡蒞至齊延訪節孝欲以風二尹王君
士元欲以事聞二女跪辭曰兩氏爲此原欲自盡
必以此聞非予本意辭甚懇遂不果聞甲午直指
連公聞其事於齊校卽行獎賚丁酉余守茲土聞
而異之以其狀聞督學徐公公嘉賞轉揭直指王
公乃具疏上聞上允其奏下宗伯錫三十金建坊
樹碑旌表其閭此勵世者賞善化俗之鉅典殊非
二女抱真本意語云蘭生幽谷不以無人而不芳

二女以之詩云鶴鳴九臯聲聞於天誠不可掩也
殆謂是歟夫士君子掇巍科顯身於天下崇高節
揚親於後世彼人爵此天貞識者諒不漫爲軒輕
齊有二女其裨於風化甚大後之重節義敦操守
垂名青史者未必不聞二女而興起也是時次女
年七十卒長女七十九歲爰記其事

重修至聖廟碑記

明平湖劉希夔

考之元水經曰闕里北百餘步有靈光殿夫靈心

靈也光心光也而以之名殿何居政爲至聖之靈
透二曜而至聖之光映萬古殿上靈光安所弗普
矧近聖人之居者乎余丁巳夏蒞齊東首謁至聖
精氣磅礴儼若親承視破瓦頽楹而心若惕夫一
廟也而闕里之靈光射焉是何可以不修乎哉吾
聞之尊帝者增太華尊后土者禪梁甫尊至聖者
新廟新之而聖聖誥新雅新盤新種種靈寶光芒
總於孔壁藏矣廟新將無弗新矣彼過魯而祀以

太牢幸里而親御講幄者英辟之美事也至治行
最著而留心翼聖者文翁常袞輩又何如拮据耶
我國家尊崇至聖非往代可比海內何之不立廟
廟何之不修何之不新有不新聖廟者必其不自
新新民者也有不修聖廟者必其不自修修道者
也廟修道彌修廟新教彌新登其堂如金如玉入
其室又富又美回琴點瑟之與廟中之靈氣何似
三桓兩觀之創廟中之光焰何似夫聖廟也而可

以不修乎哉或曰東家蒙誚彼婦遺譏泣麟悲鳳
訝聖人不靈則試顧瞻闕里知我罪我聖人不自
言乎嗟乎一靈光一闕里當年何以晦萬禩何以
彰孔師不得而知也天下萬世亦不得而知也抑
有說焉先師每於吾黨狂士致思思其一片空靈
界也王文成良知一論如幽室列炬讀之令人心
開所謂闕里靈光不在是歟是余修聖廟意也

新漏澤園記

明邑人張夢蛟

東郊之漏澤園余仲兄民部所置也蓋卯辰歲齊
大饑民鬻產典衣不足糊口而羅雀灌鼠括草木
爲食至剖生人啖之置屍積於市髑體遍於原悲
風嗚咽衰草泣燐此古今未有之變也時仲兄偕
余讀禮于里目擊而泣曰此誰非胞與久暴霜露
也於是施棺施蓆凡掩葶屍一軀者給若干錢羣
力畢集殘骸無不歸土廓外幾無隙地而死者尚
累累未已乃山貲易周茂才地三畝餘縱橫可七

百六十步許用以廣葬座嗚呼西伯之掩枯骨也
唐宗之座暴骸也元積之建義塚而陳向之創漏
澤園也外觸於所不忍視而內迫於不容已千古
同心豈與夫竊義聲要浮譽者同乎余特表之令
知吾兄創漏澤園苦心耳

邑令題名記

明令閩調鼎

士君子貴以德業垂世豈事虛文然文獻不徵何
有信從余承乏五載戊巳之交大兵逼境鄰封望

風被陷藩會盡遭屠戮我齊邑斗大土垣圍攻三
晝夜猶能力保孤城且斬級奪梯真吾邑一大劫
數也庚辰秋旱蝗肆虐斗粟千錢骨肉相食餓莩
枕籍 一婦不能博一飽誠從古未有之奇荒也
所留殘黎瘟疫盛行死亾載道甚至一庄不遺一
人已十去其七而辛巳年龍山大寇猖獗動成千
萬齊邑三而受侵城隍纍卵西南庄村盡屬焚擄
俱有揭竿走險之勢此時此景版籍空而又空閭

復匱官斯土者無日不在封疆上料理無事不從薪膽中磨練當事者尚欲以一年而完兩年之漕一人而輸全家之逋若不置功名性命於度外亦何能存此一二子遺幸聖天子睠念東土蠲免積欠清查戶口責成招徠此窮民否極泰來之日而春雪盈尺麥秋有望後之高明君子再爲之均差徭清賦役禁絕包收嚴杜侵蝕積疴其少瘳乎因歷敘於左使後來者一閱卽豐亨生聚之

年亦寓有震驚儉約之恐猶安不忘危之雅意也余瓜期矣徘徊堂楹見題名無聞故立石登記以便流覽非敢曰某也賢某也否以貽後人之品評云

鼎建奎閣記

清邑令李

齊邑清濟灣環長白拱峙若靈氣有所獨鍾然而鹿鳴不賡者屈指五十餘年是何以故不佞承乏茲土仰見泮宮頽墟爰是捐俸首倡修建告成矣

復思闕宮興實枚之詠而文曜失拱向之臨恐非
所以轉地軸煥人文也乃謀于荐紳士父老子弟
於泮宮之南雲路之北東西四通之衢創作杰閣
以祀奎宿將由此而遷移地脉昌隆人才乎然而
未敢必也夫士受命于天乎受命于地乎亦在乎
人而已蓋世有不祠而福斷無不耕之穫倘諸士
昧于就將斲厥修業而以祈靈于堪輿天官詎可
得之數哉不佞受性踈劣而早歲頗知自強鄉國

臨場奎屢入夢卽科名不足重而人至天通胡可
誣也若堪輿天官之說固不屑爲諸士道矣順治
己丑曲周李倩記

重修東臯學宮記

邑令余爲霖

今上御極之二十有二年武烈允茂海宇敕寧乃誕

敷文教

命天下有司捐俸修理黌宮者錄功序用霖忝載於

茲蓋二年餘矣朔望拜謁目擊鞠草心竊傷之然

而力不暇給也齊邑七載饑饉士糞民艱迓盜逋
乘宵小載塗愧以才涼德薄濫膺百里之寄盤錯
當前利器幾折悄悄乎如燕巢幕也遑恤其他乎
第讀聖賢書一行作吏鄰接鄒魯莫或光大其訓
以紹洙泗之傳肥仁義之地而升堂入室迺又坐
視宮牆之傾圯蕪穢而不之治咎孰甚焉况重之
以

綸音宣諭乎爰擇癸亥冬月興工增築垣墉彩繪棖

齊東縣志

卷之七

二十一

桷立扁於龍門戟門而樹之以栢鬱葱巍煥赫然
改觀越次年夏月告竣惟時督工者典吏張習孔
耆老孫夢鯤王愈而地方趙萬冬輩也贊襄厥事
者縣丞周令德教諭王治世訓導馬登遠典史王
家傑也欽遵

王言恪修

聖廟則知縣余爲霖也

遺愛井記

邑人楊篤生

增生

歸蘇鎮舊傳唐魏王李密花園處有七十二井旋
浚旋塞皆鹵故也鎮之東南有新鑿者可飲而距
鎮二里許民之艱於汲也非一日矣邑侯余公來
牧茲土周急濟危無事不以愛養百姓爲心偶因
公至鎮而知其汲之艱不勝歎息曰是安得夫井
之近且甘者以蘇吾民乎甲子歲孟秋以內簾赴
省至鎮而雨雨止得井痕於鎮之南父老子弟往
觀焉且以告公公命里人浚之得泉而美民咸稱

便曰是非公德澤所感而何以得泉若此也遂相
與立石以記之曰余侯遺愛井異日膺卓異之選
民遮道不能留庶幾見此井如見我侯也其亦甘
棠之遺乎

傳

張隱君傳

明狀元韓敬

清河郡望今寓內稱獨盛然族分支散未有名德
隱行踔絕前後以余所覩史冊如劉宋蕭梁間則

卷稷未嘗不廢書艷歎

以爲千古希覲不謂當吾世而得仲鱗氏仲鱗品
珎韻上絕似六代第一流人至出所爲世德傳視
余則諸父群從後先廕映乃知琳宮瑤圃中豈有
凡卉木哉居恒屈指名闕其榮戟叅天鼎鍾照地
者不少然或以茅胙開金貂耳卽以經術自奮名
致華貫未必皆譽冠人倫聲播金石也仲鱗氏
萼聯秀按平與之二龍同荆歡株實河東之三鳳

旣已間世一覲矣至伯之農而慕義仲之孝悌而
俠烈季之謝陌上之桑償井上之李種種奇俶偉
卓令人肅然整襟不敢以今人視而仲鱗則欲然
曰此家隱君意也却奔女而償無主之金殆以身
教矣余益慨歎何今人之不如古當張澄之起於
晉也曾卜墓于窮景純舍三司而就卿棧以故累
世貴顯與六朝相終始第此猶求福於冥冥者隱
君修德于明而食報於幽豈澄所可望見歟異日

紀右史者不貴清河而貴齊東必自隱君始高陽
韓敬撰

序

登第序

明劉應遇

余不佞楚產也客濟上獲交張仲鱗季鱗及郭涵
之三君今年庚戌仲鱗成進士還里門涵之偕二
三子圖贈一言而屬余夫余何足重仲鱗且仲鱗
豈以一第重哉迺其世誼則竊心儀之有日矣蓋

齊東縣志

卷之七

序

一二十三

仲鱗家世多長者太翁至性孝友事伯兄如嚴父
生平雅行陰善人人內德之却子夜之奔閭室堪
質皇天償化人之負寸心許對冥友凜凜轉頽俗
而振靡骨手校書千卷授仲鱗仲鱗慧性好古
奇落筆爛焉雲霞樹誼敦倫奉二人啜菽盡其歡
聞人缺失護之惟恐不周卽獲無良年少婉辭而
遣之排難拯溺爪髮不自愛也所稱恂恂君子非
耶至事關大義身爭之屹乎山岳無與奪豪右

謁不能降以相從居恒施人不念有負輒折券不
取而飯王孫者啣之不去心卽近者李生餽金數
鎰無何化爲趨送其家封識宛然一片肝腸有如
皎日也季鱗之才之義一肖太翁而與仲鱗齊德
仲鱗遭時遇主以元德奮功名且載爨釜而炳日
月國家政以仲鱗重仲鱗豈以一第重哉知仲鱗
者何俟余不佞也因次其語質涵之而授吾門二
三子

青李園稿序

邑人張夢鯨

青李之說蓋自 右將軍昉云德潤先生以是名
園卽以是名稿誠以曠襟坦度千載神交而臨池
之技飄若浮雲矯若驚龍者又每相當焉耳是編
豈徒風流之緒已乎嘗三復於斯竊爲是佐彰瘡
代袞鉞而陶鑄一世者也近世作者卽炳然鏗然
類邯鄲之幼婦等夫臺之金聲於世道奚裨先生
以殊絕人物獨擅史才當其憩息名園凡徃古墳

典昭代圖書畢羅於中一投筆輒躍然不自禁要以覈於性而澤於道故讀壯夫傳而毛髮上指讀烈節傳而柔腸欲斷讀觀史諸論而徃輒之得失剖若列眉讀關中濟上諸咏而閭里之習尚洞若觀火以至闡幽人之孤踪寫忠臣孝子之隱微令人擊節歎焉是編之有造於世也不朽矣卽其先令通渭再令吾齊魚懸珠返虎渡鯉潛振人文轉四十年之厄運軫民瘼起數十萬之疲癯庸知夫

種種善政非是編之實用也耶又庸知夫異日握樞柄而廣施暨於天下不如兩邑之霑洽也耶余久困棘圍幸先生下車首注人材拔之儔人之中隆以國士之遇手授是編受而卒業若重夜列炬頓覺蓬心盡豁取道而前廓如也併及之以志遇合云

新設義庄贍貧學田序

邑令余爲霖

一物不得其所儒者不忍也況於四民之首乎惟

爾多士誦說詩書非不知治生之爲急而力孱財
窘呼籲無門此千古豪傑恒致歎於時之未遇也
予少時訪學三楚倖登賢書困頓春闈三十餘載
足跡半人區而艱阻備嘗每讀詩至綿蠻杖杜之
篇未始不奮然興也茲宰東臯寸長鮮效民雖小
息士尚終窶日夕焦思莫可適願廼舍人李璲者
籍本長清寄庄齊邑以其地畝來鬻爰欣然如莫
直以與之庶可以行吾志矣計其地貳頃柒拾畝

陸分有奇牧斯土者歲給牛種召人分種以其所
入供錢糧漕米之需自正供而外敢有婪官奸胥
指雜差爲名侵尅自肥者神其殄之度其所餘除
將所收之穀糶銀肆兩助義學之束修歲以爲常
他則散給本邑庠中實在應考之赤貧聊資篝燈
其或家有斗升稍可自給不得寡廉鮮恥混冒支
領至於明經之士原額縣學二歲一貢給銀伍錢
以壯行色其本縣舉人查照已經起咨赴京會試

者各贈卷價壹兩倘非計偕無容濫與若夫諸生之得科舉者不論正考遺才照定名數各送鄉試卷資叁錢大約每逢三年大比然後分惠一次非然則以濟吾貧儒而已矣嗣是以往賢有司者出增爲置之則士有餘糧清操樂道以共躋聖哲之域而無負孔孟之所傳則幸之甚也

重修南關石橋序

邑令余爲霖

朝廷張官置吏所以爲民計安全者豈惟橋哉嗟我

齊東縣志

卷之七

序

一二十七

齊民昔罹亢旱饑饉洊臻闔邑嗷嗷謀生鮮術其濯伐林木者十之八九焉毀撤墻屋者十之五六焉典鬻子女者十之三四焉至於無木可伐無屋可毀無人可鬻者則流離他鄉比比皆是嗟乎民之陷溺至此極矣歲在辛酉霖奉

命來蒞茲土雨雪載塗而耆耄童穉槁項黃頰鶉衣露體相率趨迎視其形瘁如也觀其俗純如也爰設法安集竭力招徠禱雨立沛而年豐催科寬限

而財裕清田糧之欺隱而困窮以甦除逖盜之株
連而頑讒以化于今三年推其餘力可以捐吾俸
修學可以訓吾民識字可以纂修通邑誌書爲後
代之勸懲若夫南關孔道修橋利涉直末見之一
斑也迺善人李克順者獨任厥事於九月某日興
工十月某日告竣從此行道之人登津梁而游於
蕩平之康衢不致有淪胥及溺之歎者豈惟斯橋
云爾哉

重修曹家馬頭石橋序

邑令余爲霖

王道之興也抑何幸哉自齊邑七載饑饉人民離
散諸務廢弛而徒杠輿梁先王之政蓋已邈乎不
可問矣邑之西曹家馬頭當東省孔道接連小清
河舊有石梁而洪水傾圯行道興嗟雖有仁人救
濟鮮術可勝悼哉歲在甲子仲春之吉曹喬二生
慨然以修復爲己任率其里人遍籲四方之賢有
德者將欲舉而整造之庶幾民不病涉三代之

可復覩也安得長橋千萬丈普渡蒼生俾陷溺之羣咸登彼岸是則我之志也矣

祝余侯華誕序

邑舉人張成憲

公志則聖賢而才則豪傑也近今多良牧矣或稱能敏或頌廉平要未有豪傑而聖賢如我公者夫聖與賢非異人大約所主者誠所行者敬其功神以速其效久以大攄公所爲學孔孟而綜周召何多遜耶若夫豪傑則不同有哲人焉其居官也察

有介人焉其居官也毅有仁人焉其居官也和有奇特磊落之人焉其居官也變化錯綜不離乎法讀石松堂集天樞地軸皆經緯也子孝臣忠皆條貫也日星河岳皆光華也禮樂文章皆制作也出豪傑之類拔豪傑之萃非氣雄養淡何克及此向齊多荒歉歲比不登公泣任之日雨雪滿野累書大有焉邑少旱公步禱之無不應故堂聯云十二時莫欺自己又云不負皇天不負后土豈非誠足

格神者耶公度端嚴不輕色笑乃勤以恤寮屬謙以延薦紳臨民若父子接讀書之士若師生謁然抑然時而秋肅不廢春溫也蓋敬以行之又如此不兩月而文教興不三月而丁地晰不四五月而強梁屏不數十月而風化成神速久大班班可考起孔孟於今日建周召於東都無以過之而且以聖賢兼豪傑之爲則片言折獄神姦立獲察何如也粗糲自甘事無不舉毅何如也學宮久頽墻垣

低破成通衢焉公曰此根本地也分俸鳩工不煩生徒不需捐助而垣崇栢茂廟貌巍然矣其解逃人也連良善者置勿問株鄰甲者置勿問旋獲旋解捐囊以資路費焉計兩年中獲解數十起矣所捐亦不下數百金此中全活多少性命完聚多少室家載道口碑傳此爲第一善政云惟易以布省民財也蔬薪溢價揀遠商也凡此皆公之和也更

有出人意表爲從來良吏所未及爲者棒可代办

家自爲守蓋且勇且 而不知公之傲於井田也
草可爲筆人盡知書蓋辨名辨數而不知公之通
乎學校也向多逋賦今刑笞不用

國課辦焉向多刁悍今聲色不動民訟息焉凡此則
變化錯綜不離乎法也蓋有異人乃有異政區區
龔黃足云乎哉今

天子聖神撫司公愼薦書交上

溫詔頻頒出將入相非公其誰任之至賡三多頌九

齊東縣志

卷之七

序

三十一

如非予之所以祝公而亦非公之所樂取於予也
已

祝邑侯余父母壽序 大冢宰李之芳

夫稱人之壽者以其際遇者言之乎亦以其建立
者言之也如以其際遇言之則凡門列戢戟馬佩
鳴珂考鐘而出擊鼓而入曳朱紆朱位列三事者
皆得以壽稱也如以其建立言之則必上致君下
澤民勲名載旂常使感恩頌德者百世不衰乃可

以壽稱焉茲逢侯生申之旦邑人士相率爲稱兕
介壽之舉而請僕爲祝釐之詞僕與侯仲兄佺廬
翁同喉活

王朝有僚友之誼且敝邑之與齊邑壤相接也知侯
宜莫僕若固樂爲之言矣

朝廷之設官也原以爲民而官之與民近者無如守
令而令較守爲尤切民之望於令者養與教而已
朝廷之責於令者亦養與教而已養之道惟興其

利除其害而已教之道惟勵其學問厚其風俗
而已侯知此矣故他政未施先招致流亾給以牛
種使廣爲開墾三年以來四境之內阡陌相連無
不新發于耜而流離之子悉歸樂郊又令開井種
桑勸民蠶繅而帛之所出昔歎無襦者今且五袴
間有不足復捐穀賑濟其省耕省斂之遺風歟侯
若曰利興而害不除未善也民害於額外之火耗
也侯盡革之民害於漕運之腳價也侯請復之民

害於使費諸陋規也侯盡除之民害於串票之需索也侯自辦之民害於盜賊之竊發也侯多方緝捕之民害於修河之柳也侯請免之民害於逃人之牽累也侯則捐資作費旋獲旋解之此日之民庶幾 遊春臺而安衽席矣侯若曰教之不立未善也於是修整學宮設立義學復買義莊以資師儒入其境絃歌之聲日夜不絕彬彬乎文章之區矣侯若曰教君子而不教小人未善也爲之講郡

約愼訟獄作長歌令民誦習故民之 之桁楊不事而揖讓成風若比戶可封也侯若曰養矣教矣而古禮不復廢典不修未善也乃舉行鄉飲酒禮一遵戴經所載是所謂觀於鄉而知王道之易者也又取舊志而纂修之筆者筆削者削默寓懲勸之意皆弼於教養之大者也甲子分房所得四人皆名下士其首拔任子卽成進士焉夫侯以不世之才蚤年而薦賢書制藝已遍行海內至於古文

則西京而上詩歌則大 以前出其學術以成治
績皆王道之大爲塘虞三代用之而無不效者故
民不病而上令行亦未嘗有催科政拙之譏也豈
曰武城之雞焉用牛刀一割哉東漢循良不足爲
侯道也今當課功之期山左卓異非侯而誰自此
而銓諫自此而公卿侯之際遇正無窮也侯之建
立正無窮也而侯之壽亦無窮矣

祝邑侯余父母壽序 大宗伯沙 澄

今上御極之二十有四年孟夏望後二日爲東 明
府楊翁余侯覽揆之辰邑之父老遠詣京華謀所
以祝侯者同造予門曰吾儕小人沐浴德化三載
于茲今屆岳誕之期將羔羊兕觥踵先民之故事
躋公堂而獻壽焉願乞數言以侑康爵予謂侯乃
大司農佺廬年臺之介弟也同 朝共事交歡有
年况花封密邇燕畿侯之文章經濟久已譽滿長
安得其行事爲甚詳幸托鄰編誼不能辭粵稽天

下之治也視其民民之治也視其牧蓋親民莫
令邦本繫乎民周官立縣正漢制重循良明于求
治之源矣我輩讀聖賢書一旦躬膺民社之寄任
事固在才而端本惟貴廉使徒廉而非有才以濟
之則四知克敦一籌莫展不過趙魏老焉而已然
使有才而不本廉以出之卽庶績咸熙民艱囹恤
究于地方何裨是才與廉無容或偏也兼之者其
惟我侯乎齊邑人稀土曠饑饉洊臻困苦情形鄭

圖難繪侯以明睿之姿剛介之性自辛酉季冬飛
鳧入境見村墟寥落趨謁之童叟鵠面鳩形惻然
動念博咨利弊務次第興除之如徵糧舊例每月
以三限爲期甚至五日一限稍有未完押追侯比
殘黎疲于奔命正供愈滯侯則甲頭立革雜派有
禁改爲一月兩限自封投櫃則耕織暇而財源開
繁費省而財流塞輸將恐後敲朴不煩撫字與催
科並行今之有司若此者曾幾人乎賦役遺累皆

由欺隱詭寄之未除侯則每按告發丈畝研丁豪強無所容其奸愚懦得以安其室鑿漕運之需費也則有復給脚價之請知臨倉之勞民也則有改折銀兩之請慮協柳之難購也則有河遙免派之請凡流民復業多方撫綏捐給牛種以資東作勸農桑而敦節儉瘠土變爲樂郊或民間有不平具詞赴控惟虛公剖決令其揖讓請息而後已片言折獄訟簡刑清侯無私人亦不敢以私于之逃人

盜案曩歲恒苦株連侯則稽察素嚴拿究無縱沿途解費悉傾已囊誣扳詐害洞若觀火彼無所利相戒潛踪良善永無雞犬之驚共安耕鑿皆侯之賜也朔望講約近日視爲具文侯則親臨論說併刻勸民長歌使其聞言遵行以秫稽爲筆沙土爲紙諭里老教習姓名數目等字而四鄉以內無不識丁之人在城則設義館貧民子弟咸獲肄業其間修黌宮以崇文建石橋以利涉傾圯無弗治也

積倉穀以濟民置庄田以贍士惠養爲甚渥也蒞政之暇輒進兩齋諸生課文講學孜孜不倦故文風丕變士行還淳且邑志自萬曆而後六十八年未經纂修財賦之盈虛政教之得失人物之臧否幾于湮沒無聞侯則廣爲搜羅辯訛訂誤類輯成書三年以來百廢具興較俗吏以征輸緝捕爲能者其相越爲何如耶至于冰署之中衣必屢浣食無兼味居官儉約不減清白家風廉而有才口碑

載道雖古良吏何以加焉夫是以下慰民望 結
憲知值此

計典報最之時候將首膺卓異
內召臺垣由宰一邑者推之爲

國家宣德意海宇沛恩膏懋績鴻猷應與山甫方叔
同壽天壤豈安期羨門之流所可得而頡頏也哉

祝縣尉王君美壽序 邑令余爲霖

浙水吳山輩出異人如陽明先生理學勲名纘緒

槐堂光前烈而裕後昆天下之王氏咸樂稱而願附焉予承乏東臯始至之日百姓遮道颺言邑之所以值久旱而饑寒至極不忍去者有尉如王君是以願緩須臾冀天心之回庶幾相依無患也蓋尉秉性醇慤不妄言笑雖盛怒而詞氣雍容髣髴儒者對胥役士庶皆若平等其取與不苟大遠乎時吏之所爲以故懷其德者鼓舞歡忻萬喙一辭如此及予與之居三閱歲矣跡共行事折衷群言

無間也夫今之慈廉者幾人哉乃王君位卑職微而民愛戴之不置彼夫擁高爵食厚祿徒侈誓誥之虛文矯飾清白紛紜生事而實惠漠不下逮者宜其聞此而惶汗欲絕也矧天之福善不在其身必在其子孫若乃官高無後其心術可知矣惟君之令子四人常接見於政事之暇見其彬彬孝友天其將昌王氏耶於以嗣徽景叔赫奕舊聲可翹足待也雖君之年蓋壯矣壽而且臧以襄予之不

逮而慰答士民之望其曷有艾焉

銘

三女銘

邑令白鯤

混沌既剖漸漓淳風千年笄輩幾播芳聲猗歟齊
甸天挺雙貞霜篁同節雪松並清澗秉質是惟
心銘

華陽張公銘

大司空張延登

謂公天授耶胡為乎不捷于成謂人勝耶而足文

齊東縣志

卷之七

銘

二十九

預徵

公足文有
大人二字

處脂潤之地乃見其清授危難之

區乃顯其貞下豐蕭寺開府延城察其終始與范
齊名何取之大而用之宏祭自秩宗葬用冰衡夫
忠婦義國寵攸馮雙表屹立堂堂乎余之所為斯

銘

志

王三溪志

明李開先

齊東三溪王君與余姻交十五年其歿也諸子乞

余志余義不能辭王君諱一鳴號三溪生有異資
長于春秋嘉靖十年中鄉試初任林縣知縣多奇
政有聲聞父訃音不辭上官而行服除補馬邑鴈
門聲藉甚陞蔚州受知于梅林胡公時以蜚語改
令寧羗轉府史鄭王重其才召飲賦詩甚相得鳴
呼由兩邑兩州而事諸侯王無一不宜者君真不
器才也遇地震感疾請老歸以田宅分諸子惟餘
郭外一園嘯傲其中既歿遠近哀之有三溪集行

于世

張貞戴志

大司馬王象乾

自古家之興替視所貽燕身有違行神將闕之以
予觀張公夫婦無論孝敬大節炳炳若是卽如活
溺蠅救病鳥蠕動之虫亦愛之而不忍殺也視古
渡蟻者何以異安人則而象之甚至隣媪盜鉢反
手相擊亦秘之而不以語人其慈仁足述矣雙壽
期頤子孫蔚起若持左券而取償於天也語云天

道無親常與善人公與安人足以風矣

大中丞張公志

福建布政使范允臨

公諱夢鯨字仲鱗別號華陽其先世有隱德公生而奇穎有異相不妄言笑讀書目數行下才思勃發未弱冠卽補諸生食餼癸卯登鄉書庚戌成進士觀政起部遭贈公艱起授大理寺評事甲寅轉戶部主事復遭太夫人艱起補本部員外陞郎中其權許墅也正值薦饑米價匿艘不至人情洶洶

公取貨物劑其媿惡上下多少以足一年之數而悉取米稅蠲之頓使米流地上又濟貧掩骼吳民大悅有張公爲政百良令之歌辛酉出守彰德有趙藩宗槐亭者結納亾命尅期而發按道計不知所出公卽携壯士一人突至宗家陳說利害宗感悟伏地請死公教以詣府自首須指不法數事誘舍中兒當笞之而釋宗鄴中士民謂古西門豹沉巫不是過矣遂祠之豹祠之側稱兩神君云方任

二年陞按察司副使治磁州值獬賊嘯聚公授守
備范應元方畧將千人大破之武安山中獲其渠
魁河北始平于是玉璽見于彰水之濱公自
上嘉勞錫金幣甲子陞叅政移鎮汝州又值旱魃
爲虐民食樹皮殆盡鑛頭李從善夜篝火號誘諸
饑民旬日聚至萬餘駐觀音山下爲十二營以拒
官兵公僅率兵千餘與賊相持乃密給免死票于
偵者賊半散去又遣心腹說鑛角王從書佯與城

運盡得賊情實賊遂潰敗汝州以寧民立碑于觀
音山以紀其功丙寅陞按察使移鎮睢陳陳近河
土沃多豪俠復好訟公鎮之以簡鎮有投匭言事
者反坐之行之期年陳民大悅相與祠之太昊之
墟戊辰陞本省右布政遂轉左布政公益振勵九
事引之于節儉邊餉早完所省諸浮費尤多兩臺
奏治狀上褒美爲天下卓異第一已巳延綏缺撫
臣特簡用公聞命冒暑入境嚴飭堡衛簡練士卒

守禦多方百戰百克攄胸中之甲兵壯西陲之屏
藩旣而奉檄提兵入衛星夜飛馳勤勞過當疾甚
遂瞑上聞痛悼贈兵部左侍郎賜祭葬蔭公凡十
一任兩奏最三遇覃恩皆贈父母如其官後以二
品得贈祖父母云

詩

詠東山圖贈朱兩川兵憲 明李東陽

綠波宛轉通林塘青崖半出高雲涼孤松十丈絕

齊東縣志

卷之七 詩

四十三

灑幽鳥不鳴晴晝長我公自有東山墅亭午陰中不
知暑白石青苔看奕碁殘陽忽下清江渚謝老風流
天下聞我公所在無邊塵淮淝事業等兒戲世事悠
悠安可論

午日泛大清河 明楊玉潤

天涯令節喜天中江上龍舟此日同誰向羅川懷屈
子且從濟水泛群公晚風習習青帆動落照茫茫碧
漢空更是夜來新月上良宵佳景亦難逢

首秋夜大清河泛舟

明楊玉潤

新秋雨露多水漲大清河漫有乘舟興還宜對酒歌

中流簫鼓動夾岸樹烟 月色知人意瑤光滿碧波

其二

明楊玉潤

雨後泛輕舟良辰此共遊 爽知無暑熙穰慰有秋

月光如練素星影帶河流子夜方歸棹漁簑隱隱收

題麻姑仙

明鄒平張延登

紅塵漠漠蔽征車寂寂 寒日斜聞說麻姑

齊東縣志

卷之七

詩

四十四

節眼前那是蔡經家

其二

鄒平張延登

玉女瑤池擅岱東只因 萬方同如何冷落頽垣

裡衰草斜陽對朔風

題張隱君

明吳亮嗣

不以文章寵依稀太古心豈能飡秀色終自薄黃金

拙守傳爲世清風直到今賢書題二美遺物意何深

其二

明王春

分得清源湛碧流故多温潤濯皇州酬恩不爲存亡
易遺教惟從孝弟求一夢鯨蛟先入兆千秋蘭桂後
應稠個中俱是畱貞德無用煩心落計籌

其三

明王世蔭

家承博望總清芬高誼相傳海內聞自卻新孀堅白
壁遂令之子上青雲夢中先訂金閨籍傳上高標玉
笈文聖主卽今求舊德鸞書五色更繽紛

其四

明馬之騏

齊東縣志

卷之七 詩

四十五

鄒魯家聲世澤長大風争羨表洋洋但將玉笈探名
嶽未許金籊點敝裝經學已恢韋氏業主恩新署鄭
公鄉延齡何待靈椿頌三錫須知寵未央

十景詩

趙巖秋漲

邑令余爲霖

繚繞漁歌發飄飄匝趙巖岸青橫百雉濤碧擁千帆
槐葉迎霜醉葦花貼水緘中流休怕險砥柱定超凡

魏城陰雨

掛角書何用當年失魏城太原王氣赫雒口霸功傾
慘霧浮新堞荒烟幻舊兵可堪亡國久此地漫畱名

昌陽仙蹟

誰云瑤島遠不料寄昌陽綠水環如帶錦雲剪作裳
果朽唐旅壯鞭背蔡經惶獨幸回生手甦予在 帝

鄉

病於長安幾斃
夢仙姑救而甦

減河橫帶

坦坦周行道人猶說減河堤殘馳馬曠樹老宿鴉多

齊東縣志

卷之七

詩

四十六

月映沙分岸風迴土捲波昔時疏鑿者民力瘁如何

延安聖井

宮牆傳往蹟聞道立延安教澤依泉湧文波湊水瀾
井清天不夜泥淨地無寒明鏡泓然裏澄輝帶旭團

埧水拖藍

垂陽圍埧水揜靄自成藍紋結畱烟住痕凝和雨涵
潤週平野內流接大清南訪勝來川上醒醒興愈酣

故臺西照

不識何王築到今
誦故臺歌鐘纏樹籟
舞羽剩莓苔
戲焉隨塵沒銅駝
傷棘哀可憐
行幸處啼鳥夕陽催

東臯曉月

齊風誇大國紀勝最東臯
位近朝陽煥名連岱嶽高
疎星妝細柳密露襯穠桃
燭謝臨蟾殿晨光上穎毫

奎樓聳秀

荒城方二里天半卓奎樓
俯瞰清流腹平吞白嶺頭
書香聯桂窟墨浪滿芹洲
不數河陽縣只今卉木稠

齊東縣志

卷之七 詩

四十七

義莊興文

天下誰貧士應來食義田
莊微心地廣粟少教思綿
杏雨紅雲路麥風綠錦阡
改餘頻側耳到處動歌絃

趙巖秋漲

蘄州黃元鼎 善長

訪勝趙巖上金風奏瑟笙
湍流迴北郭古木麗前碑
雨息眠鷗靜波狂舞鷺輕
扁舟乘興發秋思一泓清

魏城陰雨

魏城何處是李密
幻稱雄戰捷功成
夢志驕業立空

三軍愁霧隱百雉淡烟籠不料荒郊外依稀海市同
昌陽仙蹟

徑環芳樹綠鬱鬱古昌陽鸞珮曾過蔡胡麻一助唐
飛雲連畫棟梟霧散爐香大會瞻遺像仙風引道長
減河橫帶

不堪衣帶水河蹟有耶無九曲憑沙壅千波倩霧塗
浪消龍鯉去岸隱柳楊鋪最是滄桑事臨隄倍躑躅
延安聖井

齊東縣志

卷之七 詩

四十八

聖惠嘉來學鬢宮忽湧泉源從洙泗引地爲孔顏傳
基肇前朝遠井開此日圓邑侯存往蹟勒字亘雲天
埧水拖藍

疏築何時事南流到白雲橋通平坂濶路轉野花芬
好兩浮新翠微風漾碧紋只 藍自靄紅紫漫紛紛
故臺西照

多少興亡後臺猶屬故王山川畱暮景村落繫殘陽
廢址鴉千點荒堤柳數行莫尋 蹕路弔古有餘

東臯曉月

散步東橋畔清光照水滄夜闌花弄影更盡酒催詩
休訝疎星隱還看曉露垂徘徊幽賞處蟾殿亦心知

奎樓聳秀

誰實培庠序奎樓百仞崇雕欄凌碧漢古瓦倚蒼穹
鵲起英才茂蟬聯甲第洪憑高環眺久壯氣馭長風

義莊興文

吾道薪傳重貧儒仰義莊捐金增舊額鐫石表新疆

齊東縣志

卷之七

詩

四十九

敬業千秋永論文五夜長鳳飛應翩翩輩出在梧桐

邑多亢旱余侯屢禱屢應二三子分韻歌功志

十首之一

邑人張成憲

屢試回天手勤勞卹物艱雲生蘇草木雷震滌關山
斂散神功速卷舒官度閒至誠真可格聲譽滿朝班

題三烈絕句

邑人任鼎玉

秋高氣烈感餘哀一炬樓頭化作煨白骨如銀經百
煉丹心一點不成灰

又題三烈

邑人王朝重

烈骨凌霜鐵作肝
栢舟莫向等閒看
祝融赤焰空千丈
依舊冰心萬古寒

齊東縣志卷之七終

齊東縣志

卷之七
詩

五十

